

SC

Skina di
CLYDE

Nieta di Director di DOW 1944-1949 ta busca su "roots" na Aruba

Skirbi pa: Clyde Harms

SC Lieke Raspe ta nieta di Lijkele de Hoop kende tabata e director di Openbare Werken di 1944 pa 1949. (E tempo ey e no tabata un departamentu di gobierno ainda). E famia de Hoop tabata nos bisiña. Nan tabata biba den e edificio na Lagoenweg (awor Caya Mario Harms) caminda Centrale Accountants Dienst tin su oficinanan.

Lieke ta pasando vacantie na Aruba cu su casa Cees Meeuwse cu ta un capitán pensiona di KLM. Lieke su mama, Martha de Hoop a nace na Corsow y a bin Aruba na edad di ocho aña. Den mi



E autor hunto cu Cees y Lieke.



Lijkele de Hoop na final di decada di 1940.

buki Storianan di Mucha di Lagoen mi ta conta cu Tiene de Hoop, ruman di Martha, tabata bin toca piano na nos cas y a gradua di Julianaschool na 1944 hunto cu mi ruman Nel Harms. Jannie, e otro ruman di Martha a casa cu un polis aki na Aruba y eventualment a bay biba na Nieuw Zeeland. Entre tanto, Jannie y Tine a muri.

Martha a pidi Lieke busca algun informacion di caminda el a pasa su prome añanan. E prome lugar cu el a bay ta na Biblioteca Nacional. Aya, asina cu el a menciona Lagoen, nan a papi'e di mi y di mi buki Storianan di un Mucha di Lagoen y asina nos a bin comunica cu otro. Nos a acorda di topa diadomingo pa mi a conta Lieke tur loke ami por corda di su hendenan y mi a dune varios pòtret cu mi tin den mi archivo.

Lieke y Cees ta super-fascina cu nos isla. Tur dos a yega di bi Aruba prome como miembro di tripulacion di KLM, pero nunca hunto y semper djis pa un anochi so.

Nan ta namora di Isla Renaissance y e center di Oranjestad. Diadomingo, durante un desayuno largo na Matthews restaurant, mi mester a contesta masha hopi pregunta tocante Aruba, su historia, su turismo,

su hendenan y di hendenan y lugarnan cu Martha a anota.

Mescos cu a pasa aña pasa dia cu mi a topa mi amigo Ayang Wong despues di 70 aña, e desayuno di diadomingo a evoca memorianan bunita cu mi tabatin dera den lo mas profundo di mi consenshi.

Como mi tambe a biaha hopi cu avion, y recordando loke a pasa recientemente cu Germanwings, e subsidiario di Lufthansa, mi tabata contento cu Cees por a splica mi hopi detaye tecnico y politica di e industria aereo, cosnan cu semper a intriga mi.

Naturalmente nos tur tres tabatin hopi storia di conta di tur e viahenan cu nos a yega di haci, y nos a pasa basta tempo intercambiando anecdota riba bulamento; experiencianan espantoso, lugarnan interesante cu nos a bishita y a laga nos impacta. Pero semper nos tabata bin bek riba e topico original, Aruba.

Un di e fotonan adhunto ta muestra Sr. Lijkele de Hoop tempo cu e tabata na Aruba mientras e otro ta muestra e autor cu Cees y Lieke desayunando na Matthews diadomingo.

Si abo ta corda Martha de Hoop di tempo cu e tabata biba na Aruba, please contact me na mi email.

Por contact Clyde Harms via
clydeharms@yahoo.com